

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 7 1940

T 3200/0823.83 17

7

廣德州志卷十

哈佛大學漢和
圖書館珍藏印

營建志

兵防

郵遞

倉廩

市鎮

坊表

兵防

廣德營都司署舊為遊擊署楊志在州治南順治八年知

州塗應泰買民房改建案遊擊於乾隆二十二年裁缺

改設都司遂為都司署大堂二堂三堂各三間儀門三

間鼓亭二座官廳書廳各三間衙舍三間軍裝庫三間

旁有箭道演武廳三間乾隆四十一年衙舍傾頽都司

會攀桂移州詳請修建工料銀一百七十七兩零

有卷

干總署舊為中軍守備署李志在遊擊府右案干總本駐防界牌汎詳職官乾隆三十八年裁守備缺改城守移駐城中遂為干總署

演武廳楊志在東郊康熙四年知州楊苞重建舊止一進今三進繚以墻垣左築燾臺

營房楊志在州治南舊倉基共一百間案康熙魚鱗冊營基共三十所

汎地通志汎地墩堡十一處楊志四鄉共十二處康熙二
年知州楊苞立捐俸建木樓十二座防兵朝夕瞭望以

備不虞案今止十一處乾隆五十五年營房瞭樓木牌俱有朽壞知州胡文銓詳請帑銀九百九十八兩零修葺凡營有鎮協統轄者由鎮協勘估無鎮協統轄者由附近協鎮勘估藩憲周照例咨協鎮安慶副總兵特勘實於五十六年六月先領八分工料銀七百九十九兩零七月興工修造

界牌汎

州東三十里

東亭湖汎

州東南三十里湖下保

千口汎

州西北八十里

杭村汎

州北十五里

案楊志東路三汎界牌東亭湖車裏北路汎二杭村

千口今無車裏其四汎皆干總管轄撥兵防守

誓節渡汎

州西五十里

柯匠汎

州西六十里

青洪嶺汎

州南四十里

前冲汎

州南七十里

楊灘汎

州南九十里

長洪關汎

州南一百一十里

三十六都汎

州東南六十里

案楊志西路汎三誓節渡柯匠舖公館嶺南路汎四

青洪嶺前冲舖楊灘舖唐辛今無公館嶺而唐辛本

保名今改稱長洪關又有三十六都此七汎係把總

管轄撥兵防守楊志又云力行保甲設立鑼炮遇有

盜警卽發炮鳴鑼逐路迅追蓋是時山險尙有藪奸

故立此弭盜之法李志概行刪去非也

建平汎七處

通志

建平縣汎地墩堡七處

楊志

白茅山朱

塘舖青苔嶺俱知州楊苞捐建木樓以備瞭望縣志雍

正間知縣衛廷璞增建東夏

縣西

梅渚定埠

俱縣北

顧置

西北

俱廣德營

郵遞 附亭館

州與建平皆四達之衢也舊嘗置驛雖久裁廢而文檄交馳各有程限萬厯志謂之舖舍今更為郵遞云

州驛傳通志原設馬三匹馬夫二名後於題明請將等事

案內裁減馬一匹馬夫一名今現設馬二匹馬夫一名除另給捐置馬田租稻外工食銀七兩二錢買馬銀一十兩帶閏銀二兩一錢六分鞍轡等銀六兩雍正十二

年核減艸料等銀

詳賦額

建平縣驛傳通志原設馬三匹馬夫二名後於題明請將

等事案內裁減馬一匹馬夫一名雍正六年全裁

案桐川有驛在治西二十里萬歷志猶存其基於古

蹟楊門等志遂不復詳今依通志所載驛傳列之

州遞舖二十有九萬歷志舖司兵共一百名

總舖 在州治西見萬歷志下同

長岡舖 州東一

王婆舖 州東二

分界舖 州東三

搭畢舖 州東南二十里

東亭舖 州東南三十里 案

誤從南畿志改正

石磴舖 州西十里

豐塘舖 州西二

英溪舖 州西三十里

柴岡舖 州西四十里

誓節舖 州西五十里

柯匠舖 州西六十里

劉村舖 州西北十里

石凌舖 州西北二十里

陸家舖 州西北三十里

黃家舖 州西北四十里

峻巖舖 州南五十里

汪家舖 州南三十里

青洪舖 州南四十里

黃栢舖 州南六十里

前冲舖 州南七十里

楊灘舖 州南九十里 案舊

十里楊門等志俱作楊灘舖去州南九十里以道里近遠計之州南達六舖相去以十五里為率則楊灘為是然南畿志亦作土橋訪郡人則土橋實在汪家舖南十里又五里而為青洪蓋俗所謂腰舖從中接應者故舊

志附之前冲之後而楊灘本名小土橋或遂因此傳訛也

株樹舖 州北十里

楊邨舖 州北二十里

水沁舖 州北三十里

洪村舖 州北四十里

澗西舖 州北五十里

屠村舖 州北六十里

山西舖 州北七十里

案南畿志載遞舖二十九由州前總舖而東達舖三

曰長岡王婆分界西達舖六曰石磴豐塘英溪柴岡

誓節柯匠南達舖六曰峻巖汪家青洪黃栢前冲土

橋北達舖七曰株樹楊邨水沁洪村澗西屠村山西

東南達舖二曰搭畢東亭西北達舖四曰劉村石凌

陸家黃家萬歷諸志並同則自明嘉靖迄今遞舖如

故也惟土橋今為楊灘稍異耳

建平縣遞舖十有二巡警舖九萬歷志舖司兵共五十九名

總舖 見萬歷志縣治前見楊志下同

浮塘舖 縣東一十里

濤城舖 縣東二十里案舊作濤成南畿志及楊門志俱作濤城今改正俗又作桃城見後

長樂舖 縣東三十里 白茅舖 縣東四十里案舊

門志俱作白茅今改正 方家舖 縣南二十里

十字舖 縣南四十里 廣寧舖 縣西南五十里

諸塘鋪 縣西南六十里今作朱塘

邵家鋪 縣北一十里

陽春鋪 縣北二十里

謝家鋪 縣北三十里

顧置鋪 縣北四十里

案南畿志載建平遞鋪十二由縣前總鋪而東達鋪

四曰浮塘濤城長樂白茅西達鋪二曰廣寧諸塘南

達鋪一曰十字北達鋪四曰邵家謝家陽春顧置萬

歷志所列正同有鋪名無里數楊志始依縣志注若

千里門李因之

橋南鋪 廢

錢旦鋪 廢

傅村鋪 廢

忠義鋪 廢

高廟鋪 廢

案楊門志並云自橋南至高廟五鋪縣通廣德舊路明洪武八年知縣王克友改路東行立浮塘等鋪五

鋪久廢

附巡警更鋪

東門鋪 東門外見楊志下同

西門鋪 西門外

南門鋪 南門外

北門鋪 北門外

東嶽鋪 縣治西北

縣前鋪 縣治南

學門舖廢

井泉舖義井

善政坊舖縣治

亭館附

皇華亭州治右見萬

丈量碑亭州治西知州鍾振

楊苞修見楊志

廣長亭州治東十里地名長

學正沈儀范建鹽商造菴三間

使僧照勝守之見萬歷志

白茅山公館州西五十里

楊灘公館州南九十里

以上本州以下建平

接官亭縣東三里廢基六

憇遠亭縣東五

永豐亭縣南

豁眸亭白茅山嶺雍

惠遠亭走馬嶺上

永惠亭縣北三里欵

迴瀾亭縣西知縣茅成鳳建後圯知縣衛廷璞修

課農亭縣東藉田側知

間廚房二間左右隸房

陳村公館縣南四十

倉廩

廣德土田磽瘠歲獲無多舟楫不通生計有限諸凡
悉倚辦穀入賤賣以應徵輸遇小歉卽十九待哺廩
人所積幾何識者謂常平社倉不可少也萬厯志之
言如此考宋紹興間知軍錢觀復請建常平成淳中
常懋發社倉粟則未嘗無之特善後無人耳迨楊守
建常平李守立社倉後人遵循恢拓制益完備積貯
亦豐矣

和豐倉南畿志在州治東萬厯志洪武初建今改爲大察

院

預備倉南畿志一在州治東案魚鱗册名官倉基地三

在儒學西萬厯志在州治南案即儒學西也洪武初建成化間

知州陸鳳重建楊志今改為營止存五分之一康熙五

年以倉在營內輸納不便移建於州廳東

常平倉通志在州署東偏即舊同知署案宋紹興間知軍

錢觀復請建常平倉楊志康熙五年知州楊苞移舊預

備倉於舊同知衙基又造常平倉於後李志共四十七

間雍正十二年知州李國相新建倉八間分人壽年豐

四廩乾隆元年又建新倉八間分時和歲稔四廩案是

倉於乾隆二十六年知州魏廷會詳請添建廩房稱常

平倉八十六間案楊李所建共止六十三間此云八十八

可額貯穀三萬六千石加收南米及馬田稻租不敷存

貯現將穀五千餘石分貯民房寺院潮濕可虞防守未

便應添建七座共二十一間請於社倉本穀一千六百

石歸入常平糶價銀兩給發工料未及興工二十八年

署知州高瀛洲於七月修竣三十一年部准核實銀一

千七百三十兩零合新舊倉凡一百七間四十一年署

知州楊天文以倉房卑小詳請改建大倉九座計三十六間四十二年知州石應璋領帑興工修造四十三年部准核實工料銀九百三十兩零五十一年知州穆通阿又詳請拆修未准五十四年知州胡文銓以舊倉坍塌二十三間詳請工料銀九百五十兩零拆修五十七年舊倉又坍塌二十一間詳領工料銀八百八十六兩零修有卷

兵餉倉通志在常平倉左楊志康熙五年知州楊苞建於

舊同知署案此即存貯南米者

馬田稻倉楊志在州廳東常平倉後

九鄉義倉萬歷志在預備倉右萬歷五年知州吳同春建

楊志云今廢

舊水次倉在州北三十里倉河渡明初建倉於此後改建

於建平詳改折漕糧碑見藝文

水次倉通志在宣城縣水陽鎮距州二百十里萬歷志先

在寧國府水陽鎮案當云先在倉河渡此謬永樂間本州同知李暹

申巡撫改建於建平縣治南嘉靖十三年知州胡萬里
 增建倉廩十間萬歷十三年知州陸長庚復建倉水陽

凡起運兌軍貯頓於此案萬曆二十三年知州段猷顯
 詳請改用折色奏准立碑詳藝文旋復運米李志康熙年
 間知州李勳買民房四進為上糧花戶息肩之所有碑
 記

案廣德先後建倉之地及運米買兌之艱苦載改折
 漕糧碑極詳中稱奏准以萬曆二十三年秋糧為始
 改徵折色如果三年毫無拖欠以後年分另行議請
 考是年知州為段猷顯萬曆志載李天植所撰段侯
 修學記稱侯以癸巳八月握符治郡癸巳乃二十一

年也改折最為此州善政不知何故暫行即止意必
 徵銀不能清欸之故惜哉負此賢守之用心也但此
 碑係李得陽與夏良心同立何以志中不一提及反
 言水次倉先在水陽後改建平復建水陽豈傳信之
 道乎今倉在水陽已久民亦習而安之但其始末不
 可不明故仍其舊書之而附辨焉

社倉李志乾隆元年知州李國相奉文設建四鄉社倉

東社倉在東城外福星橋菴北一座四間 南社倉在
 南城外緣覺寺北一座四間 西社倉在西城外祠山

殿西一座四間 北社倉在北城外關帝廟北一座四

間各貯穀石每春分給借農民秋成還倉民多賴之案

乾隆五十六年知州胡文銓因選充四鄉社長逾期缺

額并據紳耆呈稱自五十年旱災後民力未紓詳請照

舒邑社歸官辦之例以甦民累奉批准行有卷其四鄉社

倉原係借設在廟祠中今宜各還其舊互詳漕儲

建平縣

和豐倉南畿志在縣治東案今無可考

預備倉南畿志在縣治西萬曆志同李志縣治四里許洪武年

間知縣史智可建倉廳三間東廩八間西廩九間廳廩

十二間正統八年知縣李觀重建今廢其址尙存

常平倉通志在縣署東懷仁祠右李志縣治儀門左康熙

三十七年縣令茅成鳳重修日久頹朽且不敷積貯雍

正七年知縣衛廷璞捐俸重修上造氣樓下易地板計

廩六口共二十餘間

舊水次倉南畿志在縣治東南案今久廢

水次倉李志在寧國府宣城縣水陽鎮河東正廳三間四

廩共八間凡起運兌軍貯頓於此四至開列碑記倉之

西南隅向為土人所租賃遂久假不歸雍正七年知縣衛廷璞照界清查追復原址

社倉通志縣南盛村保雍正九年知縣衛廷璞建李志縣南六十里倉屋六間田地共十一畝零

市鎮

州無巨鎮其商賈往來之地有村聚邸店者十數處

界牌州東三十里

東亭湖州東三十里

朱灣街州東北三十五里

城塢里州東南四十里

車里州東南六十里

張村州東南三十里

土橋州南四十里

栢塾州南六十里

前冲舖州南七十里

陽灘州南九十里

陸家舖州西北三十里

誓節渡州西五十里

福巡溪州西南五十里

獨樹圩州西南七十里陳陽司舊駐此今裁

楊邨溪 州東北二十里

門口塘 州北三十里

上柳寺 州北三十里

流洞橋 州東北四十里

杭村 州東北五十五里 杭村司駐此

案通志載州鎮二一為杭村有巡司其一即四安但

四安屬長典詳名蹟此不便載

建平縣

廖店鎮 縣東十里

桃城舖 縣東二十里

畢橋鎮 縣南四十五里

姚村鎮 縣南七十里

鴉山鎮 縣南九十里

東夏鎮 縣西二十里

鍾橋鎮 通志鍾橋市縣北十里 亦曰鍾喬街今亦名鎮

梅渚鎮 縣北三十里 定步上橋鎮 通志定步市縣北四十里一名

鄧步亦曰定步街 案定步街猶州之郎步街也今俗步作埠

定步下橋鎮 縣北四十里 又有定步市皆云縣北四十里今考上下

橋即定步也 不復分為三

案縣志止載廖店鴉山梅渚上下橋五鎮通志加鍾

橋定步二市然定步即上下橋實止六鎮今又補其

四

坊表

旌閭表里朝家盛典得者咸以爲榮然而入仕者必無負乎科名砥行者當無虧於節義故萬厯志云實不中聲清議集焉不如不坊之爲愈蓋於嘉獎中寓激勸之意舊志所列半就湮廢今存其名并新增者如左

開天重地坊萬厯志在州治東

近日名邦坊萬厯志在州治西

案二坊楊門等志不載知其廢已久矣然萬厯志有

自言今廢者楊門又皆載之而藩憲廢坊則萬厯志亦不之及今取萬厯志書之而補以楊李兼考存廢其新建者附後

司馬上卿坊在州治東為夏良心立

案此下七坊今並廢

諫議坊在州治東為李天植立

案李志有會魁坊在州治左嘉靖中為潘潤立此前乎夏李二坊萬厯志何以不載潤係建平人縣固有會魁坊矣且係正德甲戌進士何至嘉靖間州始為

立坊也今亦無知者

三俊坊在州治東為甯珂李謨李得陽立

經魁進士坊在州治東為李崇謙李得陽父子立 **案**楊門等志刪

父子二字非

振綱肅紀坊在州東察院左

激濁揚清坊在州東察院右俱知州龍大有立

案右二坊楊門等志不載蓋廢已久矣李志又有秋

官坊在察院左嘉靖間胡萬里為王祐立考祐為建

平人仕員外郎萬厯志並無此坊今更無知者

節制三楚坊在州治東為巡撫湖廣都御史李得陽立
柱史坊在州治東為御史巫繼咸立案是坊嘉靖四十一年建今存

秋官第坊在州治東為郎中張金立案是坊今廢

進士坊在州治東秋官第北為張金立案是坊宏治四年

建今存

聯桂坊在州治東為兄弟進士沈憑沈冲立今廢

登雲坊在州治東為進士張政立今廢

天官坊在州治東為李謨立案是坊萬曆二十七年為嘉

靖進士李謨及贈吏部主事李淳立今存

狀元坊在州治東南久廢知州李得中重建蓋以景前賢

而勵後學楊志云為錢用壬立案今亦廢

藩憲坊楊志在州治東為甯珂甯瑞鯉立今廢

案此萬曆志所無以修志時未建坊非闕也

都憲坊在州治南為姜洪立案是坊今廢

經魁坊在州治西為姜溥立今廢

孝子坊李志在州治西為潘晃李彭年姚觀壽立

案萬曆人物志載宏治間知州范昌齡為三人總樹

一坊而坊牌門不之及則亦久廢矣然今尚有知其名者

登雲坊在州治西為舉人丁濬立今廢

步雲坊在州治西為舉人黃章立案是坊今廢

始科坊在州治東十里為舉人步槐立案是坊今廢

進士坊在州西鄉為王世祿立楊志在西鄉五十里

案萬厯志所列止此尚有二節婦坊見後

尚義坊李志在州東五里尚義橋西為曹氏立

案是坊今無知者李志又載義塚坊在州東五里判

官鄒守益為監生夏森立考萬厯義塚志會記此坊而云久廢蓋木坊也彼詳則此可畧矣

孝子坊在州東北十五里三溪口保乾隆年為雲像會立

節婦坊萬厯志在州治東為曹丑妻田氏立今廢

節婦坊萬厯志在州治東為呂氏裴氏蔡氏立今廢

節孝坊在北城內興福坊萬厯三十三年為張近妻劉氏

立現存

案中現存者六坊柱史天官進士節婦陳劉氏張

劉氏五坊皆明世立王楊氏係新立二劉氏坊不見

於萬歷志乃張劉氏楊志列女傳中明言建坊北門而坊表中仍止載陳劉氏而不及張劉氏何也

節婦坊楊志在州治東為李熙美妻夏氏立

節婦坊楊志在州治南為陳槐妻劉氏立案是坊萬歷甲

辰年建今存

節婦坊楊志在州治西為阮燧妻夏氏立

忠節坊李志在州治西舊有婦死節於此故名

案有婦死此但當稱節何忠之有恐傳聞之誤今廢

詳坊保

貞節坊在南城內昇平坊乾隆四十二年為王德純妻楊

氏立

貞節坊在小北鄉磚橋保乾隆五年為伏謙光妻吳氏立

節孝坊在小北鄉磚橋保乾隆五年為奚大正妻雲氏立

節孝坊在州東北十五里大塘村為沈士瑛妻施氏立

節孝坊在州北四十里雙溪保為巫兆鈞妻劉氏立

右本州坊表

承流宣化坊楊志在建平縣治前明成化七年建嘉靖三

年知縣黃寬重修以下並據楊志

大憲伯坊縣門前為副使呂盛立

敕錦坊縣治東北為舉人潘顥立

大方伯坊縣治西北為布政使宗璽立

進士坊縣治北為知縣戴初立後移置義井左燬於火

登俊坊縣東南二十里為知縣潘珪立

會魁坊縣東南三十里為副使潘潤立

彩鳳鳴陽坊縣東北四十里為員外郎王祐立

世科坊縣西二十里為知縣夏宗仁立

鳳鳴高岡坊縣北四十里為副使呂盛立

節婦坊萬厯志為夏商八妻戴氏立

楊志無

貞節坊楊志縣東南三十里為邑民潘奕三妻應氏立

案楊志所列止此

純孝坊李志縣治東南為孝子宗維漢立

右建平縣坊表

廣德州志卷十一

營建志

津梁

津梁

山溪盈涸靡常其涸也丈五之溝耳盈卽汪洋浩漫矣駛流衝擊往往不循故道有渡變爲橋橋變爲渡者因而石易爲木木易爲石又有舊時石橋今絕無存或反在平陸者非因時修葺曷資利濟爲參考各志以城鄉方隅近遠爲次附碑記以考年月庶覽者燦若列眉焉

苦嶺關通志州東南七十里明一統志在州南六十里萬曆等志俱七十里路通

浙江安吉州界明正德十二年孝豐賊湯毛九倡亂知

州周時望率民兵守禦於此互詳名蹟

案萬曆志以渡歸塘別立關梁門但州屬止苦嶺一

關而渡多至二十餘處故依楊志作津梁

誓節渡萬曆志州西五十里唐末黃巢為亂土人張姓者

率鄉兵捍之誓死不退遂歿於溪故名**案**此即元和志

所稱桐汭水也詳山川

滄河渡萬曆志在州北三十里通志作**案**明初建倉于此

故名倉久廢因訛倉為滄萬曆間州守陸長庚始設渡

船並捐置田五畝五分渡基二分建屋三間紳耆王煜

王貢董其事康熙十八年民婦韋氏呈稱故夫徐應昭

存日捐田九畝七分給渡夫管業春夏設船濟渡秋冬

架木為橋恐日久乾沒及渡夫橫索錢文請勒石垂遠

經州守高拱乾批准立碑現存三十三年屋傾里人洪

韋沈徐趙王許七姓重葺學正盛彰記

沈家渡萬曆志州北二十里詳橋

咎埠渡萬曆志在州北三十里楊志作二十里

朱灣渡通志州東北四十里路通長興楊志云向未疏通
康熙五年知州楊苞設立簿埠移文浙江湖州府水道
通行不容釘塞簿筏往來商賈便之案諸志皆作朱灣
埠俗名亦然今依通志

右本州關津

東門渡楊志在建平縣治東

案此下皆據楊志其見於通志者七合溪歐陽赤山
東夏李村荆軻清溪

清溪渡縣治南舊有普濟橋後廢為渡案是渡通徽寧要

道徽商置渡田南門村王姓置橋田水發掉船水落架
橋俱王姓司之

陳家渡縣東十里

歐陽渡縣東三十五里

烏盆灘渡縣東南二十里縣志同李志
作二十五里

合溪渡縣東南三十里

忠義渡縣東南三十五里

汪家渡縣西三里詳惠
政橋

吳村渡縣西五里

犁耙渡縣西五里

破塘灣渡縣西十里

松梗渡縣西十里

東夏渡縣西二十里

狗兒渡縣西二十里

季志縣志俱作吼兒渡詳橋

栢枝渡縣西二十二里

赤山渡縣西南五里

三溪渡縣西南十五里

李村渡縣西南二十五里

吳家渡縣西北十里

荆軻渡縣西北三十五里

詳橋

案楊志寓賢門稱建平有荆軻渡荆軻橋荆軻廟不

知其名何自而起或曰其地產荆意者為荆柯而訛

為軻然又不當有廟今所祀果何人也今考高淳縣

尚有荆軻墓荆軻殿稱為荆將軍縣志辨其為非刺

秦皇之荆軻又引古今逸史云荆軻字次飛曾斬蛟

除害又云廟在溧水縣南高淳舊為溧水是為荆次

飛無疑據此建平與高淳接壤所謂荆軻其亦荆次

飛與

右建平津渡

梅公橋萬厯志在州治右

案南畿志載州橋十有七萬厯志增至五十有五亦云多矣通志錄二十四橋今皆據之而一統志所載各志所補及今所增又復不少故舊有者皆取最前一志書之增者以案別之

王家橋萬厯志在復初書院後李志云下通秀水案是橋元至正八年建明嘉靖間建復初書院當其前書院久

廢新建者在西學基址橋今在尊經閣後亦名獅子橋

三步兩橋李志下通秀水案在西學基後俗名三步兩條

橋其水一通鮑家衙一通柴巷口

楊門志未載

案萬厯志所載楊門志多因之通志亦復相同李志增入之橋不詳建造之年今皆注楊志未載以別之今此所增半係新建不復注

武定橋萬厯志在州治北舊名迎貞因屢圯立真武廟以鎮之故今名武定南畿志以此為首

上松橋萬厯志在州治東開化寺右

下松橋萬厯志在州治東東嶽廟前

復古橋萬厯志在州治東舊名寺河橋知州魯臬以洪水

漲沒城隍遂塞石溪門令民復疏水溝因名其橋曰復

古楊志刪魯臬以下則復古之名晦矣

迎春橋萬厯志在州治東一名濟民橋因迎春過此故名

梅婆橋萬厯志在織染局左

案橋名有梅公梅婆又有杜公杜婆蓋皆當時建橋

之人也

杜公橋萬厯志在西社學左李志下通秀水

杜婆橋萬厯志在西社學右李志下通秀水

六斯文橋李志在州治西六斯文巷內下通秀水分流楊志

未載

栢溪橋李志在州治西南下通秀水楊志未載

五馬橋李志在州治西北下通秀水楊志未載

銀錠橋李志在州治南下通南街秀水入古研池流繞學

宮後楊志未載

倉橋萬厯志在州治南預備倉前

玉帶橋李志在州治南三峯樓前通秀水入古研池塘楊志

未
載今毀

案此橋諸志不載始見李志今已填塞說詳秀水及

藝文

梅花橋明一統志在州治城北門昔橋旁有梅樹奇絕可

愛案是橋下通秀水會水關出城通志混作鳳凰橋

斗門橋萬厯志在州治北

織女橋明一統志引輿地紀勝云在近市案是橋舊志失

載今無可考附列于此以上二十一橋俱在城內

鍾秀橋楊志在鍾秀門外即小東門康熙七年遊擊李成龍捐

俸建

楊苞新建鍾秀橋記州舊有六門其東南隅曰石溪位
臨巽方風和木秀鼎峙丁坤克禘地脉所繇來尚矣不
知塞自何年冠裳凋謝今一旦重開斯文色起葢仗兩
憲臺俞請暨郡人士懇陳所致也惟是鹽行肆廬新集
其地門以外貨鹽者車牛任輦於此往時鹿場免窟今
稱日中孔道則橋梁在王政造置之條公餘偕遊府曜
淵李公散步南池公謂余曰君之化宏棫樸而恩及鱗
繩者德難更僕數獨建橋一事盍昇諸余以成君讓善
之志爰屏騶從偕行蒙茸間顧謂役人視我兩人趾所
及量計橫縱若干丈估費若干緡人夫若干名擇吉舉
事凡捐貲鳩工公一力專承于是山林之木良工度之
嵌巖之石巧匠斲之以逮薪者冶者披荆艾棘展土而
運甃者公之步伍騎從人人皆菩提願也閱兩月工竣
問記於余以永落成余與公共桐六載知之深自記之
晰公氣閒而肅令寬而明蒔花種竹煮茗焚香有古人
輕裘緩帶羽扇木車之風方且韜弓脫劍買犢賣刀士

恬農嬉鷄犬弗驚不佞戴公實宏且多今之登斯橋也何事侈控賊於河陽分輕兵於歸路而潭影空人山光悅鳥耕夫紅女絡繹載道樵歌牧唱聲在樹間民樂公樂而余因以樂民之樂公真惠我無疆哉公世燕京起家貴胄諱成龍字曜淵目鳳而髯虬竝得識貞珉云

弔橋萬歷志在州治東門外案俗名城河橋康熙五十四年知州周在建重造

新河橋萬歷志在州治東門外李志其流接鯉洪溪水丙申年知州魯桌築橫埂三堤以障洪濤故名案是橋砌石架木上覆以板俗名板橋上有屋五楹乾隆癸巳為水衝損屢修未成甲辰知州穆通阿令民募建越數年

知州胡文銓勸輸告成有記

河圖塘橋萬歷志在州治東門外案今為小東門李志因洪水入

城築堤障之故名案康熙甲戌即舊更造乾隆癸酉重建有碑

濟民橋萬歷志在州東二里許

福星橋亦名星橋萬歷志在州東五里無量溪上舊傳此

地星隕為石因名興廢不一嘉靖六年鄉宦張金妻曹

氏媳陳氏捐貲獨建萬歷丁亥夏水衝橋圯州守鍾庚

陽捐俸以倡士民釀金二千重建以上萬歷志歷知州屠謙

段猷顯始竣事馮夢禎記順治八年又為水衝隨修隨
 圮康熙三十四年圮甚州守李勳募建石橋并置橋田
 有記雍正十三年復圮乾隆三年州守李國相詳請帑
 金一千四百兩有奇修築仍舊名題曰福星再造有碑
 以上參碑後復圮乾隆三十九年知州恒豫改用木而
 及李志歲加修治至今仍之

明馮夢禎重建星橋記橋在州治東五里相傳茲地有
 星隕為石遂以名橋云州當吳越之交輪蹄交錯橋適
 踞孔道亦一要津也其水南合牛首山分流嶺乾溪諸
 源匯為一注南湖入于江夏秋間水溢怒湍甚箭橋之
 功於是為大橋建自嘉靖六年歲久漸圯丁亥夏且盡
 傾行旅稱艱當事者屢以工鉅難之凡構木為梁者再

衝波擊射輒蕩為烏有辛卯冬鍾大夫領州始下車進
 父老問疾病僉謂此橋宜亟葺大夫曰嘻民疲矣不可
 重困居數月剔蠹釐奸百廢修舉桐民以和且歲稔廩
 廩稍實父老又相率請大夫曰嘻是民志也不可重違
 于是首捐俸為士民倡鄉大夫舉欣欣樂輸大者數十
 金小者數鏹一環不旬月走集大夫遴良委任疇董工
 役疇掌籍記疇採木石竝屬能且慎者簿書之隙躬督
 察之稽勤惰審堅瑕靡敢怠事又舊石沉于沙中深至
 仞許大夫悉命撈之曰搜一石減一金也故規制一視
 往昔堅實不啻蕪之而費則減十之五經始於萬曆二
 十年之三月落成於今年之四月高若干丈延袤若干
 丈白金以兩計者凡二千有奇役既竣太學生夏守義
 以郡人之意走都城請記余曩謫桐從大夫之後未幾
 量移去迺始事實共之其何敢辭史遷有言太上因之
 其次利導之其次整齊之最下者與之爭之役也歲穰
 斯舉因時輿論克協因人貲取慨捐因帑石錯新故因
 材公藏無糜民力鮮殫費而惠之勞而佚之因勢不一
 碁而垂虹臥波屹如翼如行人稱便陋國僑之乘輿符

王政之濟涉余以是善大夫之能因也是皆可書大夫
 往守潤稱良二千石以公譴左遷踰十年守是州大夫
 不以遷客自處而汲汲為桐民造永業尤為難大夫他
 政如禱雨均賦葺賢序釐里役未可殫述茲畧而不記
 記橋云大夫名庚陽戊辰進士與余為同里人癸巳春
 三月既望國子司業馮夢禎記

國朝熊賜瓊重建福星橋記治東不五里而遙有溪曰無
 量梁曰福星相傳星實爰以名梁歲乙巳以覲省暇南
 浮石城因抱痾江上過吾友楊大夫治既至溪上梁適
 成裴回久之其水匯牛首山分流嶺乾溪諸巨浸注南
 湖以入江怒湍箭駛非石不為功且州交吳越梁踞孔
 衢信蹄輪要津但不知圯自何年今且長虹臥波民不
 病厲揭若是詢之康衢咸曰此吾州刺史楊公惠也公
 甫下車亟問吾桐疾苦息訟勸農捐耗足賦以清勤廉
 慎正己率屬橋之圯亦有年矣公佚我以勞不費而惠
 吾儕細人焉知所謂星實惟履斯橋若戴福星焉余聞
 之益信王政重橋梁仁人多利濟也大夫旋迎余至州
 治備詢所以守桐者承家節操為政心閒即橋又見一

斑于是桐之子弟介父老前面請以永落成重違諸人
 士心姑就橋論若姬穆龜鼉淪于誕端明萬安侈于神
 皂江青龍成速而易遷南徼度索荒遠而難究皆昔人
 思垂不朽者豈若茲橋不尸功不殫力相時而動觀厥
 成貽厥寧其規制眠昔堅實過之使耕夫饁婦牧笠樵
 柯服賈車牛皇華星使往者頌來者歌日以億計皆大
 夫學道愛人之明德遠也季勳福星橋記粵稽王制
 除道路葺橋梁著於月令載在刑書誠為利濟斯民之
 要務而凡有守土者之大政也慨自中世士大夫視官
 為傳舍催科獄訟而外其於地方利弊漠不相關矣余
 承乏茲土周視四境山溪環遶而東郊為江浙通衢距
 城東五里許為諸水所匯尤屬巨浸先是郡紳張公諱
 金者始建尚義橋以渡行旅廣長宏壯為一郡冠創自
 明之嘉靖丁亥至萬曆丁酉未六十年為蜃所傾瀉伸
 陽屠公繼守是邦復整其事名曰福星橋歷西星鍾公
 至二室段公方克竣其工凡經三州守而後成至
 國初順治八年復為洪波衝折嗟乎何斯橋之難成而易
 毀若斯耶迄今四十餘年來雖權為架木架石以濟過

客而隨修隨圯春夏之交往來病涉漂溺時告余為蒿
目傷心久矣適庠生夏泐陳衡來請云有好義耆老夏
且等暨橋菴僧靜慧共願倡建環橋余亟應之曰此余
志也亦余責也余先不敢驟舉者恐自我發之而不能
自我收之耳以其工費浩繁而余之冰俸有限且桐無
富商殷戶力能捐助而不忍以大工大費煩我瘠土窮
黎也今幸有實獲我心者能不亟為勸諭勉力為之而
孰意我百姓亦遂能諒我之勞之正欲以逸之也凡闔
郡三百九十九保共計烟戶三萬零五百七十一戶每
戶助工一日其遠不及赴者輸錢三十文以資工價紛
紛子來而行商過客亦有隨意樂施者夏者銖積寸累
勞心焦思身任橋事而饗殮則取給於家陳衡與之始
終共事夏泐協力相助皆多方籌畫以期必濟而一文
不妄費一息不敢暇加之二三寅屬俱董率不怠余於
簿書之餘單騎時臨獎勸備至自乙亥八月起工至丁
丑十月告竣嗚呼方始事之日老成練達者籌之皆以
五年六年為期今幸未及三載而遂成即前之剏建者
歷三州守而甫就茲乃自我發之即自我收之豈余之

力能勝前人哉亦惟矢此一念精誠不敢視官為傳舍
而必以地方之利弊為己任庶幾天佑而人助有不期
然而然者語云有志竟成良非謬也然工雖成而尤必
為之計久遠則以所買愿懇保施宗學石巖一區并查
被侵閱祠官田二十五畝九分僧實臻所助田與勸募
善民潘文魁及眾姓助田共九十九畝五分范村保庄
房三間山一號又楊公舊助田二十三畝七分五釐四
毫七絲二忽概行收入橋菴戶內輸糧當差以備永遠
看守之資倘稍有罅隙即預為補葺更可於環橋之旁
俾住持僧歲架木橋以濟車輛毋許重載推過環橋則
斯橋之永固而難毀也又以其所存架木於橋畔構亭
數椽余捐冰俸置田十畝六分俾菴僧冬設湯夏施茶
廣濟行人今而後福星一橋得與鄧山桐水長流時於
無窮而余與諸共事者亦得附斯橋於不朽云奉直夫
夫知江南廣德州事三韓李勳撰康熙三十七年三月
日立州判蘭繩先吏目金鎮守江南廣德等處地方
左都督世襲拖沙喇哈番仍帶軍功紀錄七次食一品
俸管遊府事胡國用賜進士第江南廣德營中軍守備
津梁

李芳埏儒學署學正事舉人盛彰訓導張銓陳陽司巡檢朱文運廣安司巡檢今陞泗川瀘州吏目陳懷素杭村司巡檢張巍李國相重修記州之東五里有溪曰無量有橋曰福星是溪為吳越孔道輪蹄交錯夏秋之交雨霖溪漲道路梗塞每為畧約冲擊輒潰則是橋之建其福於州也良鉅余之來也橋復毀壞有年余心厯焉昔定州橋壞王周曰橋梁不修刺史過也用是屢為事事而宦囊空乏願究莫遂欣逢

聖天子溥頒大澤舉修廢墜緣是請動帑金一千四百兩有奇遴良委任飭具庀材踰鷓鴣堅懸磴因鴈齒不棼鼉骨永奠規式仍舊堅鞏倍蓰之向之臨流與歎者茲且掉臂而揚鑣矣恒豫重建記福星橋為江浙要道溪流湍急屢圯於水余蒞此四載思建石梁為永久計而經費甚鉅未能也爰商於州之紳士量力樂輸採購巨木鳩集羣工始事於癸巳之十一月竣事於甲午之三月計經費三百餘緡負戴同坦道之趨輪蹄無病涉之苦費少而事集余懷其稍慰矣議者謂千章之材不如拳石之固補偏救弊無貴一時而余則以為事有緩急

力有盈絀虛慕垂久之規而無補目前之急余不為也况樂輸尚有贏餘橋田歲有租息慎選董事善為經理時以修補勿使廢壞未始非即永久之計也凡紳士之好義者不可湮沒臚其姓氏壽之於石以風示來茲

案名橋以星舊傳星隕必有所據但嘉靖間南畿志

已曰福星非萬厯間屠守所改特馮祭酒記稱星橋

耳李守記謂春秋隕星書異其義與橋無取稱福星

蓋頌揚守之惠也已屬臆造乃至自序其橋工竣日

東西有白氣兩道從地起交拱如橋以為人事感召

無稽之談何足徵信故削去之

延壽橋萬厯志在州東十里

樂安橋李志在州東十里俗名七板橋

楊志未載

浪儻橋萬厯志在州東十五里

巫南橋萬厯志在州東二十里

浮潭橋通志在州東二十里

案浮潭疑卽巫南吳人呼浮如巫而南潭又音近也

南畿萬厯二志有巫南無浮潭楊李等志有浮潭無

巫南今姑並存之

搭畢橋萬厯志在州東二十里案舊志俱作搭畢橋詢里

人則因筮畢二姓居此橋因以名則當以筮畢爲是筮

亦州著姓也其公祠在焉

杜杭橋萬厯志在州東南二十里

碧溪橋萬厯志在州東南三十里碧溪之上

蜈蚣橋在州東南四十五里

以下四橋新增

觀音塘橋在州東南四十五里

章村橋在州東南五十里

大圩橋在州東南五十五里

葉塢橋萬厯志在州東南六十里案是橋係亂石結砌石

上鐫章公橋三大字成化七年造五小字里人章文傑

所建也

楊李志訛在南又失載章公名

毓秀橋李志在州東南六十里

百店橋在州東南六十五里新

頭陀橋萬厯志在州東南七十里

咎埠橋在州東北三十里乾隆五十四年舊橋朽壞知州

胡文銓捐俸重修新

長樂橋李志在州東北四十里

南畿志有其名楊門俱失載

歲豐橋通志在州西門外跨濠河舊名城河橋萬厯志云

久廢萬厯四年知州吳同春重建更名歲豐

濯纓橋明一統志在州城西門外跨玉溪取滄浪之水可

以濯纓為名萬厯志知州楊翰建知州喬岱修案是橋

久圯康熙丁酉知州周在建重造有立石乾隆初州守

羅儀曾尚增重修有記

國朝會尚增修濯纓橋記州治之西有津梁焉古名濯纓

考其始宋參軍趙子濬曾構衆春園於玉溪之上溪後

有池清澈可鑑元郡守趙亮夫面池築亭榜曰濯纓為

遊覽勝地厥後半為溪流所蝕明正德間知州喬岱規

有橋即移亭之名以名其橋志不忘也年久傾且圯前

牧羅儀謀所以新之州之士民亦踴躍以應閱二年往

來者始無病涉然兩岸築矣柱石立矣橋板鋪矣而橋

上之屋未建其能久乎予於丙寅夏抵任過斯橋而慨

然蓋甚懼夫功虧一簣者之未克底於成也爰於聽政

之暇進紳士為經久計僉曰是宜就橋之形勢建瓦屋

七楹南北繚以短垣中畱行道以通來往凡願賃居此
橋屋者取其租以為歲修可無風雨飄搖剝落之虞予
又慮橋板或不耐車輪摩碾另架一便橋以供貨車行
走夫如是而斯橋可鞏固矣乃復為之鳩工庀材告厥
成於丁卯八月噫清斯濯纓聖人猶為動聽斯橋也其
亦何幸而得邀此嘉名耶抑又思之不獨為斯橋幸且
為修斯橋者幸更為古園亭之近斯橋者幸矣望古情
深觀成有自利行人而垂永久後之經由斯橋者其永
懷清斯之義也可若夫好義者之仗助與董事者之勤
勞其功均不可泯也於是乎記乾隆十二年丁卯孟冬
賜進士出身知廣德州事翰林院庶吉士長清會尚增
撰

潘籛濯纓橋看紅葉濯纓秋水湛明霞橋畔霜
楓望處賒漫道杏林春色好紅時勝却曲江花

獅子橋萬厯志在西門外濯纓橋西三十步許明一統志

引輿地紀勝云在清霜門外案清霜即今西門也跨玉

溪乾隆初里人重募建三十一八等年為溪水衝擊傾

圯署知州色卿額知州恒豫相繼捐募重修有記

國朝色卿額記城之西有溪曰玉溪有橋曰濯纓不數武

又有橋曰獅子與州城門相為唇齒行李往來輪蹄交

錯其橋係乾隆初年里之好善者募建焉丙戌夏霖雨

溪漲橋石傾頽行者甚有戒心余自廬陽司馬而來撫

篆肩輿過此心竊厘焉下車後簿書稍暇汲汲于是前

任創修捐金不及十之一二余甚感感無如宦橐蕭然

莫之為計適有罰鍰四十金余薄捐清俸各董事亦急

公勸捐良工度之已足其用遂庀工購料以築以弁以

畚以壘立以砥柱堞以雁齒匝月之間各工落成規式

如舊堅鞏倍之向之徐步寒心者今且翼如而揚鑣矣

問記於余噫輿梁徒杠出自周官守茲土者職所應為

前人創之紳士助之余得克終其緒襄成善事耳是為

記乾隆三十一年歲次丙戌仲秋月奉政大夫同知安

徽廬州府事署直隸廣德州長白色卿額題恒豫記

獅子橋為西城外孔道往來絡繹今歲四月間霖潦經旬溪澗奔騰橋被衝圯余亟欲建復慮清俸不給將欲集議公辦有陳丁氏盛氏願出貲獨建始於九月初旬竣於十二月下旬計費二百千文人有翔步之樂無褻裳之患氏之惠也查丁氏之夫陳生桐春名錦襄固州之名諸生而桐春之祖母丁氏以奇節顯不幸桐春夭折氏貞潔自守撫養幼孤殿錫延師課讀有丸熊畫荻之風而又樂善不倦如此余既嘉其節又高其義故述其興建本末勒石垂久云乾隆三十八年歲次癸巳十二月奉政大夫知廣德州事恒豫撰

烏盆橋萬厯志在州西北七里

朱公橋李志在州西北二十里

英溪橋萬厯志在州西北三十里久廢明嘉靖四十五年州民許奎重建

白鷺橋萬厯志在州西北三十五里

冷水澗橋萬厯志在州西南四十里

楊門等志誤作東南今移正

吳馬橋楊志在州西南五十里萬厯志作胡馬橋州民濮

陽銘建

大橋萬厯志在州西北五十三里

雄溪橋萬厯志在州西北七十里

節義橋萬厯志在州南十里李志乾隆四年州守李國相

重建案俗名港橋今圯

永安橋萬厯志在州南十三里

落馬橋萬厯志在州南十五里

永興橋萬厯志在州南二十里州民濮陽海建

楊李志海俱訛晦

汪家橋萬厯志在州南三十里

永定橋萬厯志在州南四十里

土橋萬厯志在州南四十里

九龍橋李志在州南四十五里

楊志未載

柏塾橋一名敦善橋李志在州南五十里州守朱德安募

建乾隆四年州守李國相重修

楊志未載

案是橋建於康熙

壬辰尋圯乾隆三十二年里人丁一忠等募建環橋旋

卽衝壞里人丁昌恒等復募衆重建改用梭墩十餘座

昌恒獨造梭墩一座五十二年落成費約六七千餘金

橋始鞏固有碑記

魚龍橋在州南五十里雪水澗三昧菴右康熙四十一年

僧雪山建郡人王邦記乾隆三十八年圯四十六年僧

德濟重修前後兩山迴繞彤家謂龍脉所關改名迴龍

橋

下嵩橋在州南七十里乾隆三十七年爲溪水衝壞四十

三年里人耿際亨重建有記

〔記云〕桐山水皆自南而北下嵩溪發源白馬經靈山向西轉北而去靈山至此十里溪多怪石如牛如馬如小艇如覆釜如累碁溪水大漲怒濤泛石橋梁當之則圯是溪為吾鄉通郡城之要道有橋可渡北岸有亭可憩癸巳年悉為溪漲所壞經此者不啻望洋文學耿君際亨捐貲四十兩復商之同志募捐銀一百六十餘兩鳩工庀材不一年而橋與亭俱竣其利人不小矣里人焦正溥記

平安橋在州南八十里明成化二十一年建有記

右三橋新增

梅花橋萬厯志在州北門外知州鍾振築鳳凰墩于溪左

更名鳳凰橋

〔案〕楊志通志並同李志始梅花鳳凰兩載以梅花在

治北城內下通秀水合水關出城鳳凰在城北門外

未知孰是

北灣橋萬厯志在州北一里春漲橋圯州守段猷顯捐俸

重建屠隆為序〔案〕後又圯重建

屠隆北灣橋序廣德州古桐汭地東接具區南通宣歙而西控九華秋浦以達于秣陵亦一山澤間名壤孔道城北相距里許有溪名北灣環遶州後堪輿家謂實關州治發源靈山其流匯南湖以抵大江道通溧陽句曲稱境內一巨浸云每春夏之交洪流泛溢士庶褰裳則畏盤渦揚舲則戒駛漲甚或急一壺悲筓篋病涉良多正德間嘗建石梁不久而圯為患業數十年州刺史汝頴段侯以中原人豪來莅茲郡興利剔蠹百務犁然士民以病涉告侯夙駕往視太息曰王政先橋梁仁人貴利濟民病涉若此如司牧何于是首捐俸二百為士民倡郡父老子弟爭先樂助未幾而大橋落成脩十丈廣丈二矯宏規于臥虹偃澄波于夾鏡雪蓑雨笠漁樵暮

歸雲壟烟塍耕夫曉出車輪馬蹄摩肩擊轂征衫游履
 連袂蹋歌興穆如之頌洽康哉之風橋之成也所關係
 匪細侯之功德千秋哉夫穆滿龜鼉事涉荒唐端明萬
 安稍援神怪詎若侯杓運元德桴應黔首不神而神良
 足偉矣嗟乎司牧者溺其職或浚膏骨以自潤或延歲
 月而待遷往往傳舍其土而秦越其民乃侯獨不然蓋
 真焦心蒿目眎下若子而營國如家焉苟可佐黔黎之
 急者無弗為已而無弗勤已嘉政美績有口不勝頌而
 冊不勝書者若倡文教造青衿褒忠孝重耕桑拯饑疾
 務本業懲游惰議改折緩征輸省追呼肅胥吏清訟獄
 嚴齋戒謹榮雩雖古僑胥之遺愛兩漢之循良何以加
 諸建橋則其一節耳不佞聞之鵲巢麗譙泉清潢瀆蓋
 德充之符人悅而神相之矣是役也侯之部下若管侍
 御九臯及諸文學生洪生範韋生宗魯應選王生惟德
 等悉助工慕義為力而復匍匐問記于不佞夫侯德自
 不朽烏侯不佞言而不朽乎侯諱猷顯字徽之汝寧之
 商城人壬辰進士

撲水橋萬厯志在州北五里

東平殿橋李志在州北五里案橋下水來自無量溪北流

與北灣溪匯于東平溪向以筏渡乾隆四十九年判官

左宜倡募建橋名曰永濟孫炳炎章采衛並有記

東平殿橋記州城北五里有東平殿殿後大溪四鄉之
 水匯此以歸建平乃州境水口也無如殿宇久頽溪水
 驟發時行旅吁嗟乾隆壬寅司理左公捐俸印發募簿
 職耆陳尚謨等勸告城鄉踴躍捐貲廟貌重新橋梁完
 固又公買田產收息為後來修橋之費焉乾隆四十九年秋孫炳炎記

浮橋萬厯志在州北十里

土塘橋萬厯志在州北十里

金鷺橋萬厯志在州北十里

達埠橋李志在州北十里楊志未載

豐樂橋在州北十里乾隆五十二年里民捐建有記

豐樂橋記橋以豐樂名志慶也往者怒濤箭駛驚若望洋今架以木而徒馬紛紜過無虛日民稱便焉工既竣衆父老觴而落之夫橋之成有所以成之者地豐于財人樂于輸故不勞而有功命曰豐樂以慶其成也今將董事暨助金者芳名勒石

西澗橋萬厯志在州北十五里

湖南橋楊志在州北十五里州民沈一梁建

馬澗橋萬厯志在州北十七里

沈家渡橋在州北二十里舊以船渡明萬厯四十二年僧

錢明募建有碑

沈家渡橋記沈家渡乃徽寧江浙往來要道遇霖雨汎溢行旅經過濟渡溺覆往往有之僧錢明建菴溪上見而憫之募善人曹武韋宗昂等造橋復鳩二十四人為橋會各出財生放分作三班輪年修理自此橋無朽壞而永存矣萬厯四十二年立碑案今橋會中存田五十畝零三分四厘二毫

薛塘橋在州北去沈家渡二里舊為塘當渡之下流衝激

而成溪往來徽寧宜溧者必經此乾隆四十五年生員

雲步青里民張鍾琰等勸捐建造木橋并置田八畝為

修葺之費新

太平橋萬厯志在州北二十里

楊邯橋萬厯志在州北二十里俗名楊菴橋案南畿志作

楊汗橋後圯乾隆五十六年知州胡文銓勸修現已興

工

小娘橋李志在州北二十里卽節婦某氏死節處橋北有

節婦塚楊志未載

須彌橋在州北二十五里通浙要道舊建石橋後圯止存

兩塚上架木中設欄以止車販米者皆負之以過水落

則下構小橋以通車旁有菴里人置田爲橋會以時修

葺常集是菴焉新

陸家橋萬厯志在州北三十里

中娥橋明一統志在州北三十里相傳唐劉文靜夫人建

故名以中娥

案是橋最古南畿萬厯等志俱不載則其廢久矣然

名不可沒也

新橋在小北鄉得水菴僧募建未幾圯乾隆三十四年張

所雲趙希極等重修後以餘貲爲橋會有碑新

劉洞橋楊志在州北四十五里案萬厯志作劉同在州治西北楊門李志作劉洞今

沿為流洞實在大北鄉非西北也 乾隆元年僧通彩通建同修二十七

年圯僧界明重募建判官左宜有序

流洞橋序州治大北鄉有流洞橋其水自五花巖發源由東灣趨建邑陸道則上連宜溧下達蘇杭實為桐郡之通衢江浙之要道也其地舊有石橋一座乾隆元年慶雲菴住持僧通彩通建募修二十七年溪漲致傾今其徒孫界明重為修理請董事十數人為募首不踰年而觀成因序之時乾隆四十五年庚子冬臨川左宜以上本州橋八十有九

廖店橋楊志在建平縣東十里明宣德八年縣丞馬昶建

同縣志後圯乾隆五十四年邑人王大成同楊德勳等募

建

案南畿志載建平橋二十有二萬厯志三十有一皆

不詳其所通志錄二十有五亦未詳建年今據楊志

兼採縣志及今所聞補之凡不言書名者皆楊志也

新增者加案以別之

胥家橋縣東十里今廢

土橋縣東十五里

開土橋縣東十五里

新橋縣東十五里

沙橋楊志縣東二十里一名上神橋李志居民李會建

〔案〕圯後架木為橋又廢乾隆四十年故民孫大順妻楊氏捐銀重建石橋邑令王惟一記

國朝王惟一重建沙橋記跨上神港當赴州孔道下江之賈浙西者經焉大雨驟漲東北諸山之水奔注洶湧橋非高廣堅固不可舊橋久圯架以木危且易朽歲己亥庠生孫大漢大受之發嫂楊氏倡建之高三丈五尺脩十尋廣四分脩之一表裏皆用條石疊砌橋畔為亭使人得所憇經始乙未三月至戊戌二月告竣用白金千四百兩有奇世以小惠為婦人之仁若氏之利濟無窮雖巴婦之善用其財不是過也〔案〕孫楊氏事詳列女志

阮橋縣東二十二里〔縣志〕居民阮時序建徐瑤重修

孝義橋通志縣東二十五里宋紹定中建〔縣志〕因宋時居

民李貴得名

〔案〕孝義名見南畿志由來已古楊李等志作李實建既訛其名亦非貴所建也

高橋縣東南二十五里

駱村橋縣東南二十五里明永樂十八年居民駱觀募建

浮潭橋縣東南二十五里架浮潭之上故名明永樂二十

一年道人余成募建

南峽橋縣東南二十五里

中峽橋縣東南二十五里

北峽橋縣東南二十五里

雙橋縣東北十里

山下橋縣東北十五里

錢橋縣東北十五里縣志宋時錢興務募建黃時濟重建

東坑橋縣東十五里廢

諸家橋縣東北二十里

楊李志俱作二十里通志二十五里

德政橋縣東北三十里縣志明宣德八年巡檢畢昇募衆

重建

清溪橋縣東北三十里

石橋縣東北四十里

大澗橋縣東北六十里

張家橋縣東北六十里

北菴橋縣東北六十里

沙區橋縣東北六十里

惠政橋楊志縣西門外舊有浮橋名普濟在縣之南宋嘉

熙間知縣施德懋建厥後艦敝因廢為渡明崇禎戊寅

庠生烏伯龍仲龍等議建石橋未就邑侯何宏仁序李

志康熙辛未史綱等募建浮橋前令張顧行置橋田七

十九畝衆姓捐田三十三畝爲橋田復建橋房今橋廢
 爲汪家渡田房被侵知縣衛廷璞清追註冊案宋施令
 所建浮橋久廢明嘉靖間州判鄒守益檄縣復爲浮橋
 用艦三十有二署令黟簿江山有記計橋田一百四十
 餘畝管理者屢有侵蝕乾隆十七年知縣貢震撥一百
 畝入育嬰堂以四十餘畝給渡夫耕種自贍其渡夫房
 屋係生員王廷楠以父晉所遺銀五十六兩助建

明江山惠政橋碑寧廣諸山之水會建平爲大川以艦
 濟輒覆墊東廓太史哀矜不辜檄乃牧黃寬曰若邑衆
 病涉盍亟爲所命作舟楫聯比爲梁太史陟去甫度工
 牧謝病去歲四月黟簿江山攝邑政紹若績構方艦上

者戶二艦次戶一艦再次二戶最次三戶閱三月集艦
 三十有二偶比成梁浮直要津往來騎負者若履平路
 邑民曰惟太史克肇厥載惟
 牧克惠厥中惟簿克成厥終

綠龜橋縣治西白鶴觀前李志作六歸縣志辨云昔傳六
 水會于橋下故名六歸云綠龜
 者訛也

吳家橋萬歷志作胡家橋楊志縣西八里邑人宗璽令僧
 募建縣志圯後宗珊五琦六重建案後又圯乾隆七年
 潘燦譜首捐銀一百五十兩并募衆建

尹家橋縣西十五里今廢
 施板橋縣西十五里今廢案李志縣志
 俱作施家橋

蘇棣橋縣西二十里今廢

狗兒渡橋縣西二十里原名鳳凰橋明夏宗武建縣志後

圮夏元鈺重建復圮僧明智斷腕募建至康熙戊寅落

成案李志縣志俱作吼兒渡橋

環翠橋縣西二十里

流碧橋縣西二十里縣志在敦頭山王良六良七建

西成橋縣志縣西二十五里邑人張燦等捐建州志未載

三峽橋縣西二十五里宋紹定四年知縣孔惠時建通志

其水出三山之峽故名

荆軻渡橋縣西三十里明正德三年夏斌三妻以木爲之

後夏宗孟更造石橋康熙五年知州楊苞捐俸重建

大橋縣西三十里

小橋縣西三十里縣志俱邑民王廷治建

濟溺橋縣西三十里案明萬曆十三年居民夏湛賜捐建

飛鯉橋縣西南二十五里明嘉靖十三年徽人童念忠建

縣志俗傳架橋時有鯉躍水上因名後木朽萬曆三年

生員韓荆等更造以石有徽歛義官黃時濟助銀三十

兩案後又圮乾隆十三年韓文烈大模等重建縣令貢

震記

貢震重建飛鯉橋記橋跨大蘇溪橫界徽寧孔道附橋居者韓氏最繁自萬歷迄今易木以石代石以木皆韓氏任之乾隆十三年文烈大模等鳩族捐得四百餘金隣里助之伐石興工十五年冬橋成高二丈脩倍之廣三之一用白金千二百兩有奇

花橋縣西南二十五里今廢

師姑橋縣西南三十里

楊村橋縣西南三十五里縣志三十里

碧溪橋縣西南四十五里架木碧溪通宣城要道俗呼畢

家橋舊為盛氏業乾隆五十一年邑人陳廷概重造承

管歲修新增

下馬橋縣西北一里縣志明景泰五年僧惠讓建

朱家橋縣西北二里縣志宋時居民朱壽三造

裘橋縣西北三里今廢

宗家橋通志縣西北五里宋建縣志近居民宗氏故名

夏家橋縣西北十五里縣志作十里李志作夏陽橋

烏泥澣橋縣西北十五里

沈家橋縣西北三十里

梅家橋縣南三里

丁塘橋縣南三里宋慶元五年知縣葛採建縣志元至元五年知縣高璧主簿驢驢重修後廢明正德十年知縣張滌令僧募貲買石重建復圯萬曆二十三年鄉官王三聘等重建案乾隆二十一年邑人王登俊等重建港橋縣南五里今廢李志王道明建後廢架木以通往來康熙五十六年邑人王貞捐貲七百餘兩復建石橋許家橋縣南二十五里宋寶慶三年居民許日富建縣志後廢崇禎十六年邑人方聘募建今名雙拱橋

案楊李志有許家橋又有雙拱橋俱縣南二十五里

此必重出今從縣志

水鳴橋縣南二十五里縣志後圯方聘率族人重建案南畿志有其名

永興橋縣南二十五里明景泰四年邑民梁芳建

積福橋縣南二十五里明景泰五年邑民梁芳建

環秀橋縣南二十五里李志萬曆二十六年居民方孝三

建縣志

邵家橋諸志俱不言所在

莊山橋縣志在縣南明永樂二十一年李芳一建

鳳凰橋宋淳熙二年建一在縣南三十里一在縣西莊村
二十四里案通志止載縣西一橋宋淳熙初建

張公橋縣志宋時張道與募建明萬曆二十三年居民陳
憲九改建

案張公四路龍潭清碧通津踏滉鍾橋西梅等橋並
載南畿志

四路橋元建明萬曆間知縣張宗信重建俱縣南四十里
龍潭橋縣南四十五里宋淳熙間居民姚千一建

洩澗橋明景泰二年張仲祥建

雲橋俱縣南六十里

磚橋縣南七十里縣志姚姓士民建

青碧橋縣南八十里宋淳熙四年楊李等志作咸熙
今從通志下同居民

談祥瑞募建南畿志作清碧

泗洲橋縣南六十里宋淳熙四年居民談祥瑞等建李志
作八

十里

通津橋縣北一里縣志宋時居民建明宏治十一年邑民
楊萼重建一名楊家橋

踏滉橋縣北三里縣志宋時建明成化中義民潘達五等

修萬曆二十七年邑人吳國本重修後圯順治四年重修宣城湯承宗序

鍾橋萬曆志作鍾五橋楊志縣北十里宋寶慶間知縣章

一璧建縣志永樂五年邑人陳興募修康熙九年邑人

程興重修

北拱橋縣北十五里

西梅橋通志縣北三十里梅渚鎮西宋建李志丙子年邑

民陳僊佑建

永福橋梅渚鎮北李志成化三年建正德九年居民王辰

重建

蕭貝橋縣北三十里

北高橋縣北三十里

洪橋縣北三十五里縣志宋淳熙二年侯智大募建案舊作咸

熙二年考宋無咸熙年號必淳熙之訛

永康橋縣北四十里縣志明隆慶元年呂應春重修萬曆

五年呂鏊呂侯呂仗呂守仁重建石橋

通京橋通志縣北四十里縣志明嘉靖元年呂思建康熙

二十一年呂貞元呂敦禮呂家昌等重建

永寧橋縣北四十里

縣志作西北

縣志

宋端平乙未年建明永

樂二十年呂紹六重修一名上橋

以上建平橋八十有四

